

- भारतीय संविधान रा निर्माता डॉ. भीमराव आंबेडकर री 135वीं जयंती काले मनाई जायेला-राज्यथर रो कार्यक्रम जयपुर मांय व्हेला आयोजितं
- लोकसभा अध्यक्ष ओम बिरला कह्यो-भारत रो संविधान सगळा रो मार्गदर्शक हैं
- केन्द्रीय संस्कृति अर पर्यटन मंत्री गजेन्द्र सिंह शेखावत बिरखा रा पाणी रा संरक्षण सारू पारम्परिक तरीकां ने अपणावण री अरज करीं
- प्रदेश मांय आवता चार-पांच दिन मौसम सूखो रहवण अर तापमान मांय 3 उ 5 डिग्री बढवार होवण री आसं

00000

भारत रा संविधान निर्माता बाबासाहेब डॉ. भीमराव आंबेडकर री 135वीं जयंती काले मनाई जायेलां ई मौके नुवी दिल्ली मांय संसद भवन रा लॉन मांय प्रेरणा स्थल माथे श्रद्धार्जलि जळसो व्हेलां जळसा मांय संवारा राष्ट्रपति द्रौपदी मुर्मू, उपराष्ट्रपति जगदीप धनखड, प्रधानमंत्री नरेन्द्र मोदी समेत केई मंत्री, सांसद अर दूजा लोग बाबा साहेब आंबेडकर ने पुष्पांजलि अर्पण करेलां इण रे पछे आमलोग ई दोपरा 12:00 बज्या ताई बाबा साहेब ने श्रद्धार्जलि अर्पण कर सकेलां प्रदेश मांय आम्बेडकर जयंती रे मौके राज्य थर रो जळसो जयपुर मांय व्हेलां सामाजिक न्याय अर अधिकारिता महकमां कानी होवण वाळो कार्यक्रम मांय मुख्यमंत्री भजन लाल शर्मा सिरकत करेलां काले केई ठौडां रन फॉर यूनिटी अर रन फॉर इक्वालिटी रखी ज्यी हैं वटे ई कार्यक्रमां री कडी मांय आज जयपुर मांय राज्य थर री जय भीम पदयात्रा आयोजित करी ज्यीं खेल मंत्रालय अर नेहरू युवा केन्द्र संगठन कानी ऊं व्ही आं यात्रा यूथ हॉस्टल ऊं सरू व्हे र जनपथ माथे डॉ. भीमराव आम्बेडकर सर्किल माथे पूरी व्ही यात्रा मांय घणी तादाद मांय नौजवान हिस्सां लियों ई दौरान संविधान री उद्देशिका रो पाठ ई करी ज्यो बाडमेर अर जोधपुर मांय संगोष्ठी व्ही जय नारायण व्यास विश्वविद्यालय रा आम्बेडकर अध्ययन केन्द्र कानी ऊं राखी ज्यी नुमाईश मांय संसदीय कार्य मंत्री जोगाराम पटेल मौजूद रह्यां जैसलमेर मांय रक्तदान शिविर लगायी ज्यो राज्यपाल हरिभाऊ बागडे अर मुख्यमंत्री भजनलाल शर्मा बाबा साहेब डॉ. भीमराव आम्बेडकर री जयंती माथे प्रदेशवासियां ने बधाई अर शुभकामनावां दी हैं

000

लोकसभा अध्यक्ष ओम बिरला कह्यो हैं के भारत रो संविधान सगळा रो मार्गदर्शक ई हैं वणा कह्यो के हर मिनख ने संविधान री पालना करता देश ने आगे बधावण रो लगस बणावणो चाहिजे वे आज कोटा मांय खबरनवीसां माथे बतळ कर रह्या हां श्री बिरला कोटा मांय प्रस्तावित संविधान पार्क री जमी रो निरीक्षण कर्यो अर अहलकारां ने निर्देश दियां वणा कह्यो के ई संविधान पार्क मांय डिजिटल तकनीक री मार्फत संविधान ऊं जुड़ी जाणकारियां, हक अर ऐतिहासिक घटनावां ने जनता ताई पूगाया जायेलां

.....

श्री बिरला आज कोटा ऊं उज्जैन सारू सरू होवण जाय री नुवी रेलसेवा री सरूआत करेलां आ रेल कोटा ऊं दिल्ली, इंदौर अर उज्जैन रे बीच चालेलां नुवी तकनीक ऊं बण्या आधुनिक डिब्बा रे साथै आ रेल जात्रियां ने आराम दायक सफर रो अनुभव करावेलां

0000

बाडमेर जिला प्रशासन आवता 30 अप्रैल ने आखा तीज अर 12 मई पीपल पूर्णिमा रा अबूझ सावां माथे होवण वाळा अंदेशा वाळा बालकां रा ब्याव माथे रोक सारू पुख्ता बन्दोवस्त करण सारू कर दिया हैं जिला कलेक्टर टीना डाबी अंदेशा वाळां बाल विवाहां माथे रोक लगावण सारू न्यारा-न्यारा मेहकमां ने निर्देश काड्या हैं

000

राष्ट्रपति द्रौपदी मुर्मू अर प्रधानमंत्री नरेन्द्र मोदी आज जलियांवाला बाग मांय शहीदां ने सिरधानजली दीं राष्ट्रपति मुर्मू साल उन्नीस सौ उन्नीस मांय ई दिन स्वतंत्रता सेनानियां कानी ऊं दीरीज्या

बलिदान ने याद करता सोशल मीडिया माथे एक पोस्ट मांय भरोसा जतायो के वां अमर शहीदां ऊं प्रेरित व्हे र सगळा देशवासी तन, मन अर धन ऊं भारत री प्रगति मांय आप रो योगदान देवता रहवेलां प्रधानमंत्री नरेन्द्र मोदी कह्यो के आवण वाळी पीढियां शहीदां री अदम्य भावना ने हमेश याद राखेलां मुख्यमंत्री भजन लाल शर्मा ई देश सारू आप रो सबकुछ निछावण करण वाळा जलिया वाला बाग रा अमर शहीदां ने नमन कर्क्यो वणा आप रा सोशल मीडिया पोस्ट मांय लिख्यो के वां रो बलिदान भारत वासियां रा हृदय मांय राष्ट्रसेवा री जाग जगावतो रहवेलां

0000

केन्द्रीय संस्कृति अर पर्यटन मंत्री गजेन्द्र सिंह शेखावत आज जोधपुर रा लूणी हलका रा दौरा माथे रह्यां वणा फींच गांव मांय सामुदायिक संवाद कार्यक्रम मांय वटां रा लोगां रे साथे जल संरक्षण माथे विचार साझा कर्क्यां लोगां ऊं बिरखा रो पाणी सहेजण रा पारम्परिक तरीकां ने अपणावण ने कह्यो ई दौरान वणा लूणी अर धवा हलका रा तळाबां मांय जल संरक्षण अर संवर्द्धन सारू व्ह्या उपयोगी निर्माण री सरावणा करीं श्री शेखावत कह्यो के लिफ्ट कैनाल रा तीजा चरण रो काम ई साल अगस्त-सितम्बर ताई पूरो कर लियो जावेलां इण ऊं दूर दराज रा हलका मांय हर घर ताई पाणी पूगावणो सरल व्हेलां केन्द्रीय मंत्री कह्यो के सरकार रा जल जीवन मिशन रो बगत साल 2028 ताई बधाया जावण रा फैसलां ऊं प्रदेश वासियां ने पाणी री समस्या ऊं निजात मिल सकेलां

000

उत्तर पश्चिम रेलवे रा जोधपुर मंडल मांय जात्रियां ने चोखी सुविधावां देवण रा मकसद ऊं डिजिटल लॉकर सेवा सुरू करी ज्यी हैं जोधपुर रेलवे ठेसण माथे डिजिटल लॉकर सुविधा सुरू होवण ऊं जात्रियां रा सामान री हिफाजत और चोखी व्हे सकेलां लॉकर काम मांय लेवण सारू जात्री आप रा मोबाईल नम्बर माथे मिल्या ओटीपी री मार्फत लॉकर ने सक्रिय कर सकेलां ई प्रक्रिया मांय ऑनलाइन भुगतान री सुविधा ई मुहैया व्हेलां जात्री लॉकर रो साइज ई चुण सकेलां

000

प्रदेश मांय दो न्यारा-न्यारा सड़क हादसा मांय सात लोगां री मौत व्हे ग्यीं जयपुर जिला रा जमवारामगढ़ हलका मांय आज संवारा कार अर ट्रैलर रे आमी सामी री री टक्कर मांय कार सवार पांच लोगां री मौत व्हे ग्यीं ओ हादसो मनोहरपुर-दौसा राष्ट्रीय राजमार्ग 148 माथे व्ह्यां पुलिस मुजब मरण वाळां सगळां लखनऊ रा रहवण वाळा है अर एक ही पिरवार रा सदस्य हैं अ खाटूश्याम मिन्दर मांय दर्शन करण सारू जा रह्या हां वटे ई भरतपुर जिला मांय चौकीपुरा गांव कने अंजाण वाहन री टक्कर ऊं मोटरसाइकिल सवार धणी लुगाई री मौत व्हे ग्यीं अ दम्पति गोवर्धन धाम री परिक्रमा दे र पाछा आ रह्या हां

000

प्रदेश मांय आवता चार-पांच दिन मौसम सूखो रहवण अर तापमान मांय 3 ऊं 5 डिग्री सेल्सियस बढ़वार होवण री करड़ी आस हैं मौसम केन्द्र जयपुर मुजब आथूणी राजस्थान मांय काल ऊं लू रो नुवो दौर सुरू होवण री आस हैं वटे ई 15, 16 अप्रैल ने हीटवेव री तेजी मांय और बढ़वार होवण अर जोधपुर, बीकानेर संभाग अर शेखावाटी हलका मांय केई ठौड़ां तेज हीटवेव चालण री आस हैं ई दौरान सरहदी हलका मांय बत्ती रो तापमान 45 डिग्री सेल्सियस ऊं ऊपर दर्ज होवण री आस हैं वटे ई 17 अर 18 अप्रैल ने एक कमजोर आथूणी विक्षोभ रा आसार ऊं अगूणी राजस्थान मांय कठेई-कठेई आंधी अर मेघ गर्जन रे साथै बिरखा होवण री आस हैं ई बीच झालावाड़ जिला मांय आज दोपरा पछे केई ठौड़ां छाटा-छीडको व्हेवण रे बावजूद लोगां ने गर्मी ऊं खास आराम नी मिल्यो

000

करौली जिला रा श्री महावीर जी मांय चाल रह्या भगवान महावीर रा सालाना मेळा रा तैत आज रथ यात्रा निकाळी ज्यीं यात्रा मांय देशभर ऊं आया सिरधालू भेळा व्ह्यां

....

0000

देश रा न्यारा-न्यारा हलका मांय आज ऊं रीत मुजब फसल उत्सव मनायो जावें पंजाब अर हरियाणा मांय लोग वैसाखी पर्व मना रह्या हैं जद के केरल वासी इण ने विशु कहवे है, पश्चिम बंगाल मांय इण ने 'पोइला बोइशाख' अर असम मांय इण ने 'बोहाग बिहू' रा नाम ऊं मनायो जावे हैं तमिलनाडु मांय लोग इण तिवार ने 'पुथंडू' रा रूप मांय मनावे हैं राष्ट्रपति द्रौपदी मुर्मु, उपराष्ट्रपति जगदीप धनखड़ अर प्रधानमंत्री नरेन्द्र मोदी ई मौके लोगां ने शुभकामनावां दी हैं प्रदेश मांय ई न्यारी-न्यारी ठौड़ां बैसाखी रो तिवार हरक उमाव रे साथै मनायो जावें बैसाखी रे मौके

गुरुद्वारां मांय कीर्तन दरबार सजायी ज्या अर गुरबाणी रो अखंड पाठ करी ज्यों वठे ई केई ठौड़ां
अटूट लंगर बरती ज्यों हनुमानगढ़ रा गुरुद्वारां मांय सिरधालूआं री भीड़ देखी ज्यों कोटा बूंदी
हलकां रा दौरा माथे आया लोकसभा अध्यक्ष ओम बिरला बैसाखी पर्व माथे गुरुद्वारा अगमगढ़ साहिब
पूग्यां श्री बिरला ई मौके बैसाखी री शुभकामनावां दीं झुंझुनूं रा खेतड़ी नगर रा गुरुद्वारा मांय
कीर्तन जत्था प्रस्तुतियां दीं वठे ई लंगर मांय ई घणी तादाद मांय सिरधालू प्रसाद लियो